

Ningzmingz:

“Swhling Mou” Youq Ndaw Lueg Baenz Fouq



Youq ndaw luegbya Ningzmingz Yen Naznamz Yang Nazdauz Cunh, miz boux “swhling mou” ndeu, moix ngoenz cijaeu de youq ndaw rienghmou heuh “lululu”, duzmou hung iq couh baenz bang daj ndaw ndoengbya doxcanj buet daeuj coh de. De couhdwg bouxdajciengx Nungz Cwzveih. 2017 nienz doxcanj, de baengh dangdieg cwngfuj bangfuz, yungh gij diegfaex batgak,

daemzbya daengj swhyenz bonjfaenh ciengx mou, youq ndaw luegbya saedyienh gij “loqsiengj bienq fouq” bonjfaenh. Seizneix, Nungz Cwzveih lij sinhcingj laebbaenz ciengx mou ganq batgak ciennieb hozcozse, daiqdoengh 20 lai hoh gungzhoj riengz de ciengx mou, cawz cuengqlangh ciengx mou, lij gya hup daemz ciengx bya、ciengx bit, youq ndaw ndoeng ndaem makyinhdauz、maksanhcuz daengj lwgmak miz daegsaek.

◀ Nungz Cwzveih youq gwnz bya gueng mou.

(Luz Dezsanh/陆铁山 Cwng Cunghswng/郑中生 Nungz Gyahcingh/农佳菁)

Sanhgyangh:

Mbanj Dungcuz Dauqhwng Lijyouz

Mboengqneix, gyoengq hekyouz camgya 2020 nienz “sei youq Mbanjcuengh baeq muengh dieggvae — vunz Gvangjsih youz Gvangjsih” vwnzva lijyouz hangznib hoizfuk hengzdoengh haenx, byaij haeuj Sanhgyangh Dungcuz Swciyen Bazgyangh Cin Buyangh Gingjih Diegbya Bouxsien, 300 lai boux hekyouz angq youz mbanjcaz, ngon faexraeu、gwn ceiz、yawj suencaz、mbaet cazcin, yiengjsouh “saedcej miz hei qyangj”, dauqhwng bak leix mbanj Dungcuz funghcingz lijyouz. Bineix seizcin, aen yienh neix ca fuengzre binghraq giem ca ginghci gensez, okdaiz lijyouz cwngcwz yinx hek, roengzrengz ciuyinx hekyouz daengz Sanhgyangh, haenqrengz bang mbanjranz Dungcuz duetgungz gunggeng.

(Gungh Bujangh/龚普康)



▲ Hekyouz youq ndaw gingjih cim gij ceiz Dunecuz miz daegsaek haenx.

Yizcouh: Bouxdajciengx Gai Reh Ndaej Ngaenz Lo



▲ Bouxdajciengx nonsei genj reh bae gai.

Mboengqneix, Yizcouh Gih Bwzsan Cin Lungzan Cunh giz dieg soucawx reh nyaengqfoedfoed, gyoengq bouxdajciengx nonsei daj mbanj henzgyawj hai cisamloek yinhhuq cang rim daeh dem daeh reh, mbouj dingz dwk daeuj daengz giz diegsoucawx gai reh, yungh daeh reh daeuj baizdui, bouxsoucawx mboujduenh niemh huq、dingh gyaq、caengh reh、sij biuq、gietsuenq daengj, nyaengq dwk ndaw sim angqvauvau, gyoengq bouxdajciengx nonsei hix riunyumnyum dwk gai ndaej daih’it bit “ngaenz nonsei”.

(Loz Yinvaz/罗印华)

Liujcwngz: Soengq Bitlwg Hawj Hoh Gungzhoj

Vihliux bang gyoengq vunzlai gungzhoj lajmbanj baenzfouq, doicaenh gij canjnieb ciengx bitgaeq youq mwh fat binghraq haenx fukgoeng, Liujcwngz Yen fulenz、fuzbinzban cawjdoengh lienzhaeh mbanj gungzhoj, vih Dabuj、Lungzdouz、Dunghcen daengj yanghcin 700 lai boux vunzlai gungzhoj、ranz duetgungz mienx cienz soengq hawj 35000 duz bitlwg caeuq bouhfaenh swzliu, daih’iek dij 6 fanh maenz ngaenz, hawj gyoengqde demgiengz gij gietsim caeuq saenqsim duetgungz bienq fouq.

(Dwng Gwzyiz/邓克轶)



▲ Yienh fulenz ganbu soengq bitlwg hawj ranz gungzhoj.